

四庫全書

集部

欽定四庫全書

集部

檀園集卷二

詳校官中書

臣徐志晉

侍讀臣孫球覆勘

總校官進士臣朱 鈐

校對官修撰臣戴衢亨

謄錄監生臣史元善

欽定四庫全書

集部六

檀園集

別集類五

明

提要

臣等謹案檀園集十二卷明李流芳撰流芳字長蘅嘉定人萬曆丙午舉人三上公車不第因魏忠賢亂政遂絕意進取築檀園讀書其中明史文苑傳附見唐時升傳中是編凡古今體詩六卷雜文四卷題畫跋二卷雖才

地稍弱不能與其鄉歸有光等抗衡而當天  
啓崇禎之時竟陵之盛氣方新厯下之餘波  
未絕流芳容與其間獨恪守先正之典型步  
步趨趨詞歸雅潔三百年中斯亦晚秀矣謝  
三賓刻嘉定四先生集時流芳尚存三賓詣  
視其疾索所作因盡出平生詩文手自芟纂  
以成斯集三賓為作序文亦感慨悽動三賓  
字象三鄞縣人天啓乙丑進士後官巡按御

史守萊州頗著勞績掖縣毛霸平叛記載之  
最詳云乾隆四十六年三月恭校上

總纂官紀昀臣陸錫熊臣孫士毅

總校官臣陸費墀

--	--	--	--	--	--	--	--	--

檀園集序

予為嘉定之三年始謀刻四家文集於時長蘅已病臥  
檀園子躬致藥餌登牀握手長蘅為強起盡出所著作  
手自芟纂得詩六卷序記雜文四卷畫冊題跋二卷合  
十二卷題曰檀園集授其姪宜之以應予之請遂刻自  
檀園集始明年正月長蘅沒予哭其家為經紀其喪歛  
歛不能去已而刻成因為之序長蘅累世簪纓科名廿  
載文章書畫絢爛海內其徒盜竊名姓及摸勒銜售者

猶足以奉父母活妻子而長衡身沒之日園亭水石圖書彝鼎之外贏無一金廩無釜粟高賢靜士之風流其大畧亦可覩已為人慷慨遇不平事無問朝野輒義形於色然慈惠樂易其素性也喜接後輩周貧交尤喜成人之美未嘗有所怨忌時或發詞偏宕或詩文感憤類於罵譏嘲謔者有之然言者無罪聞者足戒正所謂淡於風者矣惜其窮老不遇徒放浪於吳山越水盱衡奮袂以自鳴其不平故僅存茲集以傳世使得待詔金馬



延登玉堂拜稽揚厲以上繼臯陶史克之作令鄙人小  
夫帖耳咋舌於文章之有用從此不敢侮易文墨士不  
亦偉歟而竟優游林壑以沒此予之歎息痛閔於長蘅  
也嗟乎長蘅之所流傳未知鷄林等國何如凡我公卿  
學士下至賈豎野老以及道人劍客無不知敬慕若古  
人然長蘅亦榮矣然大率珍其畫與書耳能得其詩文  
之意之所在者已不可多得而況其為人之大概乎昔  
王逸少在東晉時其精識深慮高標偉節識者信為蔡

謨溫嶠之流而為書名所掩至今耳食者但曉宗其翰  
墨此又予之反覆婉折於茲序也崇禎二年秋七月友  
人謝三賓序

欽定四庫全書

檀園集卷一

明 李流芳 撰

五言古詩 凡七十二首

冬夜書懷

懷人不能寐起行眎天末風高夜氣爽空庭貯寒月落  
木何蕭疎縱橫影交列萬籟久逾靜中懷耿不滅憶我  
心所歡生平矢相結嫵婉能幾時一朝悲契濶前日送

我行擘衣與我訣期我明月夜翩然履我閭將子無愆  
期指為三四屈筦簞既已安樽罍亦云設期逝子不來  
音塵望中絕川塗非渺邈江河多舟楫豈不顧前好或  
以事羈紲一心抱終始懷疑難自決團團天上月光輝  
有時缺藹藹庭中樹豈無辭柯葉新歡與故知恐或異  
涼熱引領還入房垂淚空咄咄

隴上別

青青隴上麥離離江邊樹此地曾別郎細雨濕歸路一  
解

郎亦從此去儂亦從此辭感彼路傍人道儂相送時

解二

不忍與郎別又不隨郎去只是牽郎衣躊躇復不語

解三

斫枝斫連理折花折竝頭今日非昨日儂身那自由

解四

一花持伴儂一花持贈郎不比花顏色但比花參商

解五

儂如車脚泥棄置亦不安郎如失林翼孤栖亦不歡

解六

儂自目送郎請郎莫回顧恐郎為儂辛淚亦為郎茹

解七

譬如不相識相會自有期但願加餐飯不願長相思

解八

酒後為鄭閑孟畫扇戲題

吾愛水上亭覆以柳如絲不獨水清淺春風故來吹水  
綠柳鬬青顧眄明鬚眉荒園二三畝新栽四五枝下有  
沮洳流上無黃草茨時亦偕吾友對此斟酌之適興聊  
復爾點綴亦何為

將赴試白下走筆別荃之

憶昔婉孌時與子有成說悠悠路傍人使我意不徹齷  
齷不足論但念子羈紲人生非鹿豕豈難相訣絕不忍  
區區誠執手即嗚咽白門河畔柳句曲邨中月維舟復

沽酒與子行相挈車塵十尺深關路百盤折奚囊共結  
束寒衞爭楚楚村醪解饑飢松柴憩煩熱十年諳客味  
夢到魂欲裂況復與子辭獨行何子子水行多風浪陸  
行畏炎魃車行虞輓脫馬行憂蹉跌世路皆如此吾生  
何屑屑白龍百畝山嘉木蔭成列竭來偕吾友掉頭意  
已決永懷向子期遂陋張生舌茲遊非本情聊以當一  
呖子如有兩意請與子長別

題荃之畫蘭

我昔學畫時意亦頗浩渺不求工形似但以寫懷抱十  
年弄筆研自顧尚草草子真有夙慧落筆那便好疎疎  
幾葉蘭此意亦難了墨肥苦無骨險瘦神亦槁縱筆傷  
婀娜取態失蒼老不獨煩位置兼亦貴風藻看子意有  
餘一往何振掉著花花離離著葉葉嫋嫋因風欲翩翩  
墮雨故天矯開簾颯生氣嫣然出物表始知畫有真俗  
工徒潦倒勉旃自珍重成名不足道因憶吾友言惜哉  
籠此鳥

閑孟遺荃之  
詩嘗有此句



燕中歸為閑孟畫煙林小景有感而作

我行江北路轉愛江南趣雖有遠近山而無高低樹山  
枯石欲死泉涸澗亦瘠平生山水歡所遇頓非故竭來  
揚子邊望見江南霧霧中何突兀金焦與北固春山一  
何青春江一何素得非筆變化毋乃墨吞吐恍如逢故  
人此意不能喻吾家嚠城東小築溪頭住春流正環門  
夏木將莽互嘗耽詩中色兼識畫中句遊好在所生毋  
為勤遠慕

登慈雲嶺還訪嚴印持忍公無敕鄒孟陽聞子將  
於南山小築信宿為子將題畫作

慈雲何盤盤  
崑崙羅衆致  
白石如疊浪  
青林若簪髻  
落日宜遠山  
況與秋爽會  
憶昨湖上亭  
解后多意氣  
感君十年心  
發我千里思  
江山日待人  
突兀為我輩  
從來費夢寐  
到此煩應對  
奇懷鬱種種  
筆墨差遠寄  
披襟欲嗒然  
相與尋冥契

苦雨行

紀戊申五月事

冬春苦不雨井竭水值錢入夏雨不休出門水接天咄  
哉造物功旱澇何其偏貧家少生事俯仰資薄田平陸  
成江湖一望令心酸二麥既已盡穉苗不得安歲功苟  
如此何以供粥餽阿母向我言汝憂長未殫且勿計歲  
功目前亦難難斗米如斗珠束薪如束縑餅中蓄已罄  
爨下寒無煙小婦謀夕春大婦愁朝餐前日雨壓垣舍  
北泥盤盤昨夜雨穿屋帳底流潺潺籬落壞不理衣裳  
濕難乾龜勉慰阿母獨坐窮憂端海內方嗷嗷常苦征

賦繁去年北大水三輔民騷然司農乏遠籌往往苛東  
南連年稍成稔額外不肯寬雖有卒歲儲傾囊輸上官  
吾觀閭左情豈堪一亩年惜哉此長慮誰為叩帝閣傳  
聞四郡間告荒憤如山賢侯軫民瘼步禱良亦虔庶幾  
回天心拯此魚鼈患褰裳出屋頭仰視雲根蟠水鳥立  
我傍鳴蛙跳我前礎石潤欲滴青燈光不炎晴占杳難  
期雨勢殊未厭翻思二三子裹足不到門何時一相呼訴  
此情纏綿且當冒雨出弄舟村東灣遠水正澹蕩樹色

相新鮮濁酒尚可賒聊以開心顏

送座師林先生被召北上

男兒生世中所貴在心期區區文字間未足定相知蹇  
余好迂闊賦性不適時落魄十載餘一朝生光輝感彼  
國士恩耿耿懷在茲吾聞昔人言詘伸各有宜有懷不  
得伸何用相知為末俗文貌繁偃僂效尊卑相對少真  
味囁嚅恐見疑先生豁達人容我放言辭況茲分手路  
長當隔雲泥臨風效微忱蓄意紛如絲

涖溪東南衝自昔稱劇邑先生脫儒冠吏治如夙習下  
車問疾苦豪右爭懾息秋霜北皎潔春風讓披拂嘖嘖  
道路間口碑豈漫滅當今服官者安坐耀朱芾吾聞先  
生勤六年如一日長官費送迎簿書苦敦迫戴星出視  
事日旰常不食永言秉此心豈但一稱職天子綜吏治  
徵書下南國異等推先生循良亦生色但聞朝署閒臺  
諫員半缺去年得俞旨至今壅膏澤擢官仍空銜毋乃  
非名實感時歎多艱增我意抑塞

去年西北饑今年東南水極目三吳間洪濤蕩千里田  
穉委陽侯魚鼈半赤子更聞邊儲空司農乏經理睠焉  
財賦區脂膏寧餘幾嗷嗷溝中瘠當復虞庚癸古人喻  
穫薪斯言亦有旨帝閭遠難排父母幸孔邇借寇已不  
再攀轅詎能已提攜滿道傍號呼擁行李惻愴慈母心  
行行且徙倚徙倚亦何為建白從此始簪筆入承明抗章上  
殿陛聖主容直言痛哭況時事上言天方難下言災可  
弭沛然發德音寬卹暨東鄙道葦庶以甦菜色行當起

先生弘此猷蒼生拭目俟

春日過梁溪偕顧虞工秦圓昔吳巒穉劉彥和遊  
寶界信宿陳氏山莊翌日將泛湖至華藏寺阻風  
不果登龜頭渚而還即事有作

梁溪足名勝春風美遊遨吾友好事人載酒呼輕舸出  
郭風日麗山水況相遭新柳正濯濯點綴舒天桃晴光  
發野色遠近勻輕描言登寶界巔極目湖天遙臺榭已  
零落松風尚颼颼山中賢主人客至愛招邀牀頭酒如



泉狂呌容吾曹明發恣幽討相與尋山椒山風忽振蕩  
湖水方怒呌華藏渺何許舟楫不敢操壯哉鼉頭渚蛇  
涎出驚濤砥柱豈有意神功一何勞下穿怪石藂濺沫  
聲嘈嘈奇狀洵不一閃倏心魂搖或如怒獸奔或如劒  
戟交或側立若屏或嵌空若寮山奴亦不俗濟勝矜捷  
趨往往輕險絕引我凌最高吾曹二三子瞠目但呌號  
落日下驥渚倒見金光漂獨山青蒙茸相望轉沈寥醜  
酒酹長風使我情一豪境清難久留歸路翻蕭騷平生

愛奇賞茲遊愜久要勿言後期賒但關所得饒

芙蓉花下獨飲戲東里中兄弟

愛此芙蓉花簇簇水之湄上有竹參差下有水連漪  
竹相映發紅白交光輝自我牽物役三年不見茲前日  
吳門歸常恐後花期家人向我言花開尚未齊連朝登  
樓望風雨何淒其恐復花顛顛徙倚多嗟咨花神好護惜  
留此遲晴曦今日秋爽佳轉覺花多姿過雨著深淺因  
風故高低既耀朝陽色更與落日宜一生愛花心輸寫

當此時何以酬花神但有酒滿卮自從抱病來甘與麴  
蘖辭對此不快飲空負看花為但願十日晴兼謝塵鞅  
羈客至不出迎閉門客勿疑雖有愛花人不如我情癡  
我思古人言勝事空自知

己酉春日以看梅到彈山信宿山閣讀壁間舊題  
如昨日耳而當時共事者徐孺穀張君實與小史  
荃之皆死矣退之有言人欲久不死而觀居此世  
者何也愴然興懷爰作此詩

七載閣中人重來死亡半巡覽驚孤遊數往疑夢幻當年詩酒徒徐生意何悍小史最清發與我情婉孌張生實同調時亦偕汗漫一朝俱灰塵蕭條空里閑不見窻中山突兀猶在眼不見門前樹森疎好枝幹山花向我笑山鳥自相喚壁間舊題字墨跡未漫漶嗟我同遊人一逝不復返曉日克山舟夕月銅井院湖波綠欲皺楊梅紅始綻曳杖追流雲浮杯激飛淀此中樂事多此日歡情變低回閱身世生存覩顏面西州下悲淚黃壚發

浩歎子懷不可道松風吹獨旦

西磧看花宿六浮閣上走筆示閑孟兼呈同遊諸

子

去年梅花新愛殺錢家渚花光與水色映徹乃如許我  
欲作一詩緒多不能舉因之發浩想就此結韻宇西磧  
亦曠莽數畝足容與竭來尋舊遊沉復多伴侶信足潭  
東西八背浮四五

山中有潭東潭  
西湖中有五浮

花繁塞遠近徑折迷

處所或疑雲浮空復道雪封塢吾徒好奇者遇境愛多

取到此徒跌宕耳目不自主翻思去年人重來僅予汝  
程龔與髯朱何意守環堵清遊信難期汝乃以予鼓昨  
夜懷陰晴江頭過風雨入春多佳日造物豈予侮茲行  
偶得遂予歌汝可舞興闌更秉燭相對寒閣語山風颯  
然清似勸手中醕買山已得計吾駕不可圉

登銅井訪三乘上人

盤礴銅井道舊遊記平樾褰衣出木杪坐覺耳目豁半  
嶺界湖光衆山爭出沒湖天西北寬山勢東南匝莫登

與縹緲相望何截葉指顧烟雲間可以一葦截山頭石  
索索歷亂如積雪俯視千林花上下同一潔山僧出迎  
我問姓始相識誰言三度遊已作七年別當時同遊者  
眼中異存歿山川閱來往笑我老日月悠悠旦宅人何  
乃為化怛終當離有漏就此得真歇

彈山左阜待月獨飲

尋幽愛獨往發興因落日坐眺湖南山光影互吞蝕湖  
中與山外倒見兩輪絕暝色下村塢十花發光澤澄波

忽凝練新月皎然出初疑琥珀光俄作琉璃色依然此  
石上變態何恍惚風細來林香露涼減酒力仰觀快澄  
霽俯瞰畏深墨林端見遠火歸徑迷欲失

山中喜張魯生至同尋熨斗柄坐湖邊竟日而還

偶作

貪遊不知止足力疲屢試起晚日當午偃曝聊自恣忽  
聞故人來發我湖上意出門何翩翩兩足殊快利嘗聞  
熨斗柄頗怪此名異昔年過其下髣髴已忘記今日天



有風湖山想奇致相與歷西磧山窮見湖勢沿流正縈  
紆撫石得小憩飛湍擊噌吰穹壁立蟲窟洗出如削成  
斗絕畏崩墜閃爍絢丹堊剝落疑文字傾厓側足過陰  
壑緣藤絕燕磯與鼃渚生平快遊地遂擬兼勝概恍惚  
理夢寐高歌遏水聲浩蕩入胸次吾欲乘長風悠然向  
天際惜哉多舟楫使我不得濟

吳門舟中邂逅閑孟自白下歸出予畫卷索題時  
予方北上走筆見意

我昔燕中歸為君作小景題詩見予懷遂擬息馳騁茲  
行復何為相對徒耿耿人生出處間一往貴勇猛媿予  
懷兩端疾走以避影見君風塵色使我意逾冷青山與  
白雲開卷發深省終當果此期無為歎萍梗

閘河舟中戲效長慶體

濟河五十閘閘水不濡軌十里置一閘蓄水如蓄髓一  
閘走一日守閘如守鬼下水顧其前上水還顧尾帆檣  
委若棄篙櫓靜如死京路三千餘日行十餘里迢迢春

明門何時得到彼長安遠於日斯言亦有以人生天地  
間所貴適志爾八極可橫驚風雲屬鞭弭胡為動羈栖  
縮縮如行蟻舍彼廣莫鄉守此涓滴水哀哉世間人都  
為名利使韁鎖一著身事事不由己請君轉頭看即此  
有妙理觀彼名利人皇皇赴朝市當其守閫時靜蹠皆  
如此知其無奈何安心勿妄擬豈無捷徑路車馳與馬  
駛吾行寧倭遲君子進以禮

宿東阿舊縣同張宗曉張伯美小飲村西梨樹下

作

寒帷見山色知是東阿路不忍驅車行願言得少住舊  
縣好村落下車日未暮青山遶村西桃李亦無數花光  
與山氣似喜輕陰護嘗愛岑嘉州花缺春山句何意風  
塵中乃與賞心遇為我傾酒筒婆娑此芳樹辛苦十日  
餘博此少時趣三杯洗顏色陶然得吾故

鄒縣道中

日出鄒縣東風清嶧山下沙路軟於綿驢蹄滑如瀉花

村一抹過山勢轉欲罅澹蕩客子心勞歌從可罷

西湖泛舟走筆戲呈同游諸子

自我別西湖且復經年矣譬如心念人一見真可喜故人知我癖置我浮家裏著意籌雲山恣情逐烟水昨夜泊湖心清月照瀾瀾今朝向南屏餘霞乍收綺城頭日欲上山腰霧未已忽然飛雨至烟雲互遮邏遙山正一抹長林滌如洗坐覺雷峰失已詫臯亭紫咄嗟旦暮間變態紛如此山光與水氣相將弄奇詭平生愛山心對

此即欲死覓句畏唐突作圖但形似不如澆以酒一笑  
鏹硯礪吾友五六人大半羈城市可憐兩聞子喀喀親  
藥餌三嚴皆好奇何為亦徙倚良會不再得參商限尺  
咫使我情悵然人事難具美舉觴屬同遊當共惜此晷  
和朱修能蕉雪詩

蕉陰六月中風前颯蕭爽夜半孤夢回時作山雪想冬  
寒雪片深敲窻得清響庭空碧葉盡幽意猶惚恍亦知  
不相遭所貴在相賞達人觀世間真幻豈有兩雪中蕉

正綠火裏蓮亦長

猷僧崖

此是猷僧崖昔有猷僧住石上松蕭疎草間虎來去香  
積飯一投衲衣酒常汙垢淨了無取何處得恐怖妙語  
衝口開懷哉不可遇

贈別不了上人

昔我叅夜臺十年懷一喝何來不了師灑然得衣鉢相  
逢杏花裏纏我問死活從來爛葛藤今朝儼一豁別我

復何往江路春風闊

為子將題夜遊卷

去年別子時期以秋中至非我故憊期人事苦牽繫故人書頻來責我意良是非獨負故人兼亦負紅樹風寒臘盡時忽傳故人意訪我南郭門竟以不見去聞之心怛怛三夜不能寐已復連夢子執手且長跼彼此更相訴繼之以泣涕子嗔我不來我怨子不過怪子何飄忽念子恐勞勩今朝果見子恍惚夢中事情多不能說示我



夜遊記烟林與月嶂點綴有微致野航容兩人小舫慳  
一醉天寒湖水濶想見子興寄子應增遠懷我亦發畫  
思平生山水心所恨不同地賴此筆墨間拂拂出生氣  
我真說食飽子無獨享媿明朝復別子當以何日會題  
詩紀歲月二月壬子歲

題畫再送王平仲

我愛燕子磯怪石吞江勢昔與伯子偕蹇驢衝曉至出  
山月隱林到門松映寺陟巔攬蕭曠尋徑造幽祕崩巖

訝天開飛閣疑鬼峙茲遊屢入夢蹉跎杳難繼猶憶風  
雨過江急布帆駛丹壁照眼來突兀使我醉推蓬一絕  
叫咫尺不得濟君行到白門勝地誇此最磯下有洞天  
王李曾小憇相與歌蜀道江聲不敢沸君其往酬之為  
我通此意

靈鷲看紅葉期沈無回不至同吳伯霖鄒孟陽方  
回巖印持聞子與小飲冷泉亭解后邵古菴江邦  
申分韵得山字

故人紅葉下頻期來此山經旬始載酒惆悵不同攀解  
后愜心賞歡焉開客顏寒巖愛晚氣移席臨溪灣泉光  
照酒白木葉上衣斑况接隱者論暫令人意閒

過臯亭龍居灣宿永慶禪院同一濂澄心恒可諸

上人步月

歸裝出西湖間道向黃鶴

黃鶴峰為臯亭最高處

屢愆桐塢期偶

遂龍居諾

桐塢為慧文法師結廬處在臯亭之西屢期予過彼竟不果

輕舟凌晨風

遙山滿晴郭丹林尚可數寒條紛無託披松指微徑聽

水捫閭壑新構爭遠勢平臺攬搖落霜餘山容淺天清  
海氣薄慙歇塵勞心始知寂滅樂

每多方外遊見僧即如故燈明一龕下夜長慙深晤不  
知山月上千林已流素出門尋舊溪愛踏松影路氣和  
空宇澄寒魄如春露去寺不數武回矚驚莽互幽泉洗  
我心微鐘杳然度

初至白嶽宿榔梅菴作

十年夢白嶽今日始一至落日捫天門寒風起枻樹怪

石摩空立崢嶸有落勢巨靈亦何意造物惡瑣碎闢此  
偉麗觀使我心魂悸白雲千山來遙空疑海氣當杯月  
在酒清景不可醉

自齊雲乘筏至落石臺留宿

五里十亭子下山忘險艱愛此溪山晴故作乘筏還寒  
沙束回湍下見文石斑旭日來暎之浮動水石間吾徒  
二三子坐穩興何閒方過藍渡橋復見落石灣落石勢  
已奇況此清流環松蘿挂絕壁古色照我顏前林正丹

黃烟郭粘遠山我欲留此石一杯酬潺湲襍被叩上方  
待月同躋攀

豐干寄懷戴天卿

我昨過隆阜問子人不識見子因吾友執手便相得嗟  
我閱世多老眼太青白如子自不羣肝腸映顏色我從  
齊雲還留連愛落石僧廚爨無烟溪邊學閉息須臾千  
村素猶餘半巖黑絕叫清景中不禁酒喉亟飛書往報  
子犯夜旋相即豈無嚴城限况復路崎仄感子欣然來

絮絮載觴炙使我獲一醉陶然共枕籍別子幾何時又  
見陽月易豐干與隆阜相望苦相憶東門李女郎頗不  
事妝飾迎門粲一笑此意可憐惜期子重來過樓頭新  
月直

冬日同袁小修王幼度諸君集鍾伯敬邸舍即事  
苦寒長閉門旭日動春意忽聞故人期欣然先客至相  
知無新舊解后關情事楚客談支離吳儂亦顚顚百年  
一夕間燈深酒難醉出門限東西欲別有餘思且喜寒

更長前街月未墜

抱疴真歇禪師塔院夜坐偶占

連夜不成寐雨餘喜得月中宵起推窗圓魄湊林缺灑  
然濯煩抱涼意下天末風泉清遠聽飛蛩一何聒是身  
本無常動念即成結遂令顛倒見坐臥分勝劣堂堂塔  
中人安閒是何訣

禪師偈云老僧自有安閒法八苦交煎總不妨

無隱上人庭中有枯樹根綴以樸花草蒙茸可愛

因為寫生戲題一詩



山中枯樹根偃蹇蝕風雨久與土氣親生意于焉聚隨

手植花草蕃息如出土月下垂朱實春羅剪紅縷

月下紅剪

春羅皆山中草名

或苔如錯繡或藤如結羽紛然燦成致位置

疑有譜吾畫能寫生寫生不寫形此景良可惜吾手亦  
不輕以畫易此景請言平不平世人不貴真貴假貴其  
名吾畫能不朽此景有衰榮莫言常住物只許供山僧

### 戲示山中僧侶

山居不須華山居不須大所須在適意隨地得其概高

早審燥濕涼燠視向背樓閣貴軒翥房廊宜暎帶或與  
風月通或與水木會臥令心神安坐令耳目快臯亭美  
林壑中塔亦稱最一樓負山立圭竇如向晦山僧請余  
住余性苦不耐勸令開八窻咄嗟變湫隘前楹布清陰  
後戶攬蒼靄玲瓏稱人意蕭爽出塵界輟然謂山僧此  
中固有解往往住山人不知山好在我昨居新菴結構  
亦可怪居然仇涼風似欲杜靈籟古梅如老宿亭亭使  
人愛其下安竈突柯條半焦壞悲哉冰玉安坐受熏灼

害見之熱五內如身被桎械誰當共拯此移竈出樹外  
面南闢小扉日與香雪對區區一緡費功德乃萬倍吾  
言不見用終為未了債

三月十三夜同陸大無界待月虎丘得殿字

清遊及佳辰載酒出芳甸日落風氣高晴郊綠初徧入  
寺踏清陰登高攬蔥蒨須臾劒壑暝素月流紺殿林影  
散積雪石光搖匹練鼓罷揚清歌人開出素面此時人  
境空喧寂同一善低回洵可樂去留亦無戀吾儕區中

人蹤跡轆轤轉今日與明日時乎會有變空懷買山期  
坐受塵網罟百年春幾逢一春月幾見春月此丘中契  
濶共談讌我唱子可和滌子端溪研

無界有宋端研  
細潤宜墨可愛

別友夏同孟陽無敕亦因修之君長過林女郎天  
素月下聽天素彈琴琵琶因索余詩走筆記事

西湖別諱子離緒不可理載酒覓一歡美人在湖溪美  
人閨中秀興會託山水筆墨出生氣坐覺山水死清音  
到絲竹所貴豈悅耳初為彈琵琶四絃萬緒起再為撫

七絃幽懷歷妙指我攜三絃客嘈雜亦可喜新聲世所尚  
古調竝乃鄙都生閒止人琴理協靜女竟彈畢清夜月  
落燈未已百年寡此歡終悲別譚子

自皋亭至塘棲舟中寓目有作

山雨驚客夢曉晴山亦喜山僧惜我行送我溪之浹輕  
舟如落葉穩坐宛在水波紋動雙趺遙山逐面徙前林  
霜葉熟風來散成綺丹黃積雨涯時與菱苻抵不知塘  
栖路沿山復幾里離憂付汗漫歸興亦容與

送王岷生歸楚

頃與譚子別輒作數日惡歸來不數日別酒為君酌老  
懷長寡歡歲晚厭離索況君胸懷人相對抉皮膜離言不  
敢深恐為衆所愕方今推楚材紛紛富述作吾尤愛譚  
子真意存澹漠此賢君所私冥契應有託清霜滿歸櫓  
寒月照旅泊君其往及之江邊問青雀

秋別

黃溪不肯長白日易云暮分手只此時扁舟東西路送

君不能遠況敢留君住別淚何可吞羅衣濕成故

九日琴琴亭獨坐看花感懷有作

去年桂花時對花懷吾友今年見花發所思人在否虛  
亭敞蕭瑟秋氣變林藪清暘喜連朝風物況重九西湖  
前月中花枝已盈手江鄉花發遲歸客幸不後前月賞  
花人今朝復何有悲來不成歡負此盈尊酒

述夢

亭亭縞衣人山頭坐涼月招手謂我來咫尺步難越相

憐意分明相望魂恍惚夢覺理何憑煩憂向明發

訪秦心卿溪上懶園不遇有作

溪上好園亭君家聞最勝經過已廿年今始識三徑翳  
然林水間愛此飛閣映位置不在多貴與風物稱主人  
意疎豁事事得真性我來不相值維舟柳邊暝見戴自  
無須悠然發孤咏

南歸詩

天道有晝夜動息兩不爭喜晝而悲夜無乃非人情嗟



余嬰此患何以處死生衾裯既已溫筦簞有餘清人皆  
樂睡鄉胡我獨惺惺自從出門來十臥九不寧夜則搖  
其精晝復勞其形常恐大命至奄忽道無成公卿是何  
物性命乃可輕學道三十年此心猶未安輾轉一夕間  
擾擾千萬端病以愛為本憂怖乃相干物生每徇性夙  
習不可刊順或忘其源逆則撓其湍心跡既以違調伏  
良亦難逝將放吾意俯仰得所歡真際未可期庶以澄

內觀

右不寐

不眠苦夜永待旦情徬徨傳聞多警急羽書達明光前  
鋒已陷敵大將隨馬亡健卒三萬人一朝血沙場孤城  
若絛卵覆車且相望天子為動色羣議紛蜩螗司馬  
出守邊元戎將啟行當時畫戰守經撫何參商曾聞右  
戰者未戰已仆僵至今廟堂間莫知誰否臧嗟余孱  
書生隱憂豈敢忘十年策不售何由斗闔閭委贄未分  
明幸可商行藏一命亦致身將母或不遑促裝招吾友

歸耕烟水鄉

右聞  
警

驅車出郭門行行憇逆旅童僕相為言有客馳馬去云  
追南行者昨已請嚴旨聞之一驚歎我罪以何抵邊  
陲奄然喪謀國者誰子舍彼逋逃臣苛此章句士士固  
各有志進退綽然耳不聞盛明朝罪士以鞭箠吾觀長  
安中縱橫曳朱紫雲臺逞高議意氣一何侈但恃敵不  
來來亦竟無恃吾儕藜藿人敢云肉食鄙進既不求榮  
退則如脫屣會當翔冥鴻何乃嚇腐鼠

右出都

我本疎狂人不適于用世當其少壯時筋力尚可試摧

顏廿年餘業已甘放廢黽勉作此來未免為貧計出門  
即不怡行止屢跋蹇祿養或可圖世難偶相值未能為  
親歡遺之以大慮絕裾者何人殆或非吾類高車易傾  
覆況復丁此季縱令為身謀亦豈徒泄泄寄謝金門友  
出處各有為同車既好我周道瞻如醉

疇昔偕茲役維子暨汪子我從中道還子亦廢然止汪  
子行斃斃念之心欲死重來復同歸依然吾與爾汪子  
功名人微尚不在此去留皆灑然更覺歸可喜舉世急

功名吾爾衆所訾曰此無遠圖區區效兒女兩人相眎  
笑吾乃狗譽毀古來耕釣徒亦各有其侶得子已不孤  
悠悠何足齒

我年未四十已懷退隱圖俯仰又十年何為尚躊躇經  
過怯往蹟魂魄識畏途去來廿年間道里三萬餘車裝  
敝屢更何況此微軀所以不自決豈徒為饑驅富貴亦  
復佳歲月待我乎婚嫁幸已畢余口亦易餬故山臯亭  
下桃李滿村墟深塢秀泉石近築靜者廬新梢想出籬

疏泉行遶渠雙壑指天目一勺見西湖言之病已蘇況

當長久居息黥補吾劓造物豈區區

右途中示  
子將三首

春光已彊半冰雪尚如此雲間寒日輝不肯照窮子喜

無塵撲面又苦泥沒趾車馬詰曲行五里當十里豈不

憚修途歸途修亦邇

右阜城  
道中

北地行欲盡始覺春萌芽村柳色已新藹藹烟中斜渡

河指齊郊河邊見歸槎淮徐行在眼吳會亦匪賒道路

空苦辛分定勿復嗟生不愛京華不如早還家還家春未暮

及見桃梨花

右德州道中

曉起占天色青天無纖滓占者忌早晴  
暫晴亦可喜瞳矐日未舒同雲復  
彌彌須臾密雪布咫尺如萬里但見  
雲濤來茫然失涯涘去住無所憑始  
識汗漫理天公作

此戲聊戲吾與汝

右遇雪戲示子將

日暮雪色深曠野絕行踪與人惑  
四方東西視天風忽然見新月冉冉  
來雲中雪亦能照夜得月光始通度  
彼九曲坂賴此雨素容不知城郭近  
杳爾聞微鐘我從天

未來已覺下界空

右雪夜至  
恩縣作

客舍東城隅西山眺望閒朝見積雪斑暮見落日殷平  
生愛山心對之了不關今朝穀城下春水始一灣麥畦  
綠照眼上有青螺鬟忽如逢故人一笑開襟顏山水只  
如此值我歸興閒歸亦有何好試問此青山

右東阿  
道中

春光無次第雪後景已暄愛此沙路平青山壓晴原下  
車策蹇行竝轡相笑言遠峰翠欲滴近岫勢屢翻惜未  
及花時指點桃李村悠然度溪橋下有碧潺湲投鞭一



盥漱為我洗煩冤

右鄒縣道中

茲山表徐方經過屢登眺偶然尋舊遊策蹇偕所好荒  
亭何蕭瑟落日春風峭河山挾霸氣四顧雄懷抱嗟此  
古戰場豈容隱者傲緬思放鶴人無乃非高蹈不見山  
下湖清如眉眼照河勢欲吞山湖能益山貌此中豈有  
意河怒湖則笑

右登雲龍山

粵客自南來吳儂從北下解后黃河邊蹤跡兩相訝問  
我歸何遽問爾行何暇同是公車人不及公車罷此時

長安客闕隘舉子舍豈知風波間有此閒晝夜於彼為

桎械於我如放赦難進而易退聊用解嘲罵

右黃河紀遇

江淮十日晴似為歸人貺濁河亦霽顏平瀾容月漾今

朝廣陵路春氣轉駘蕩邳溝日已斜瓜州潮未漲滯舟

江城邊竭來江城上櫻桃淡多姿楊柳綠無狀江水媚

春曉開此好圖障恠我思江南請君試一望

右瓜州曉望

十年渡揚子狎此如衽席今始識風波呼吸投不測舉

世皆駭機避就本無益不死亦偶然餘生真可惜不然

此春光遂與成永隔出險心已夷聊共子遊息望中指  
北固沿溪花的的言詣山之陰仰觀快奇壁偉哉鐵柱  
峰崦岬疑斧劈傍有衲子居幽洞祕丹碧洞中少寒暑

龕燈伴朝夕嗟余風波民何由得此適幸已脫魚腹復爾

耽旦宅稽首禮大悲終然度苦厄

右渡江遭風幾覆泊潤州開口同子將步

至北固山後禮觀音洞觀石壁

北固行坦迤平岡若修滕江山出兩腋羣物無遁形顧  
盼收金焦迢遙控層城城中起炊烟山氣相與凝日色

射遠江躍冶光晶熒天水上下同微波不能興翻思弄  
舟好失我向所驚下山尋花溪落日噴朱櫻花亦愛晚  
妝高低衆態生穿花藉草坐歸路香冥冥

右登北固下  
竝甘露港還

舟夾港多

櫻桃園

吾愛陶彭澤出處皆草草動必求其全俗人自纏擾吾  
爾廿年交知子如余少愛子無俗情俗情亦自好口常  
說隱淪身復戀溫飽蹉跎兩不遂此意各能了茲遊計  
百口日日同傾倒聲鼓聲動天風濤勢翻島寢食閒談諧

賴以忘病惱不知分手路只此闔門道經過雖有期別  
懷亦悄悄子歸及桃花六橋踏清曉別業在龍泓泉石  
真可老我歸百無歡燒筭聽春鳥秋風從子遊松閣為

我婦

右吳門  
別子將

伯兄性寡營生理日蕭條兩弟皆食貧汲汲度昏朝為  
農力不任課兒亦無聊餘潤或望余自顧無脂膏今當  
遂長往念此中心焦勉謝諸兄弟此非人力邀吾宗自  
薄祐先達皆早彫從兄與仲氏當年踵登朝至今同

籍人東樞冠百僚逝者倘可留翩然亦雲霄大命既有  
制露電安可饗我雖老風塵壽命較已牢與其天斧斤  
寧以樗散逃傷彼泉下人憫我道路勞兄弟更相慰烹  
蔬傾濁醪婆娑阿母旁此樂何陶陶富貴有此否何乃  
為我驕天倫豈世情苑枯同所遭但當崇令德慎勿望

門高

右抵家

龔廣文應民偕仲和見過分韻得蕭字

前日故人來遺我酒一瓢開之冰雪香獨醉安敢饗扁

舟繫門前好客不待招空庭多落葉秋老風蕭蕭缺月  
呼未出燭光青迢遙此時不快飲何能待來朝

又得支字

我本寂寞人幽憂不可支出門寡所歡不如守茆茨感  
子惠然來愜我心所期貧家雖乏供幸有酒盈卮形迹  
既已畧言笑兩不疑人生行胸懷不醉復何為

壽龔翁行之

龔翁古端士而尤愛氣類余昔穉且狂友之折行輩高

才不用世乃為後起賴翩翩三鳳毛出匣露光恠翁為  
古稀人我亦知非歲看翁尚矍鑠顧我已衰邁相與成  
老友頽景各自愛惜非山水鄉放脚若有礙節物有時  
佳詩酒亦堪在從翁杖屨游或作州閭會日月從此長  
黥劓何足悔

送張子石北上

衰柳不堪折烟霜留舊容氍毹揚子岸猶惹渡江風馬  
首初向北不知關路重黃河水連山金臺塵蔽空路難



良可歎汗漫思無窮我昔事馳騁臨老萬事慵貴交久  
削迹一丘息微躬長安尺一書十年不復通當今誰愛  
士此道如盲聾知子徒有心致身竟何從子實慕風節  
非獨文采豐遇合亦尋常壯夫豈苟同去去勿復道行  
矣慎秋冬

送張宗在偕其伯兄宗自之官晉安

君家有仙吏栽花晉安縣十月發吳江千山樹如茜知  
子重友于兼亦愛遊翫相攜山水鄉壠麓何婉孌子於

季孟間鼎足名夙擅晚成自有時涉歷乃益練賢兄  
豁達人剗割豈不慣操刀或躊躇旁觀子亦善熏風榕  
樹下秋氣芳蘭畔猩紅荔子盤雪白江瑤饌閉門但加  
餐勿使鄉心亂

夜泊斜橋同王與游顧子貽諸君步至靈巖小飲  
而下

胥江罷風雨陰晴攪游思落景靈巖下維舟識所詣入  
村山路近疎松表塔寺遂登山之椒選石得小憩已出

青雲端攬彼遠湖勢呼酒敵北風新月排雲至溪橋橫  
歸路似欲併幽趣尋山亦偶然造適焉取醉

舟發斜橋至虎山喜晴一路看花作

旭日在船窻睡起喜欲旋推篷望諸山山如曳練我  
來政及時千林開已遍花亦愛客來天應為花春先教  
雨洗妝復遣晴開面幽尋足未試一覽目先眩商量花  
近遠次第遊方便庶作十日留荅此花繾綣

自青芝看花至茶山憩山頭石上感舊

緣山數十里步步入香徑看花宜興行神逸目始定茶  
山不數仞登覽撮其勝襟湖帶長岫高下目無剩衆花  
爭獻態卷石似得柄大千觀掌現世界琉璃淨昔來我  
獨賞近乃游者競廿年懷卜築貧老苦奔迸媿此五浮  
丘後期猶可訂

同與游諸君游玄墓余肩輿先至錢家坎感舊有  
作

肩輿背同游興以懷舊發遙見坎上花高低素屏列柔

條愛紛披細路憐曲折花光自照耀況與湖天切潋灩  
爭晴空皎如花得月隨山意未已戀樹心欲歇再游迷  
昨夢一往笑回轍百年真悠悠過眼何可掇

夜攜榼至司徒廟古栢下已復篝火尋花劇飲花

下

看花晝不足尚擬乘夜遊花光宜月色林香應更幽輕  
雲亦有意遂我秉燭謀酒闌更攜尊選樹隨淹留愛此  
荒祠栢千年挺蒼蚪黯黯迷園花懸燈照枝頭登木學

巢飲歌放不可收笑語同游人尚有明日不

題畫贈聞翁

閏夏鬱殘暑園居如甌中却思好林泉無過舊龍泓深  
路入篁竹溪流漱松風蔥翠日在眸清涼變塵容偶然  
弄筆墨意與泉石通如聞溪閣響似見林霏濃龍泓老  
神仙七十顏猶童往往攜我畫榻來登此峰我欲往祝  
之道遠不可從寄此侑千觴挂壁烟濛濛

次韻荅子將見招

平生事汗漫遊跡紛難紀  
臨老負春期戢足守窮理  
西湖二月天啼鴉喚人起  
六橋泣花露兩堤夾錦水  
有時山出雲墨花潑素紙  
篷艇盡日牽藜杖終朝倚  
愛山誰如予愛畫誰如子  
會當凌烟霄暫爾混塵市  
相期刷羽翰孰肯護瘡痕  
我老甘放廢雞肋如脫屣  
看子意崢嶸猶思角旗壘  
要之胸懷真掇皮終見髓  
古來功名人可憐浪生死  
悠悠風波中吾道有涯涘  
未敢妄呈身庶以懲刑趾  
寧為不材樗勿羨成蹊李  
子書前月來誇以湖

山美子方務內觀老圃將竊比荷鋤登秋畦釋此當安  
徙壘石或栽花所謂聊復爾待子買山深相攜白雲裏

西湖如沸羹豈以此易彼

時方建魏瑞  
祠于湖上

正月晦日雨霽同歸文休張冲善少謙集顧子貽

齋中聽祖印上人譚禪分韻得理字

客愁殊未央春日去何駛樂彼幽人招快此風雨止移  
舟轉近郭着屐尋舊里鄰園梅蕭疎城上山迤邐伊蒲  
出香飯開士同法喜歸子平生歡契濶情具邇二張臭



味人傾蓋可爾汝豈徒浪詩酒會欲了生死去年狂飲  
徒奄忽喪予美傷仲從也悠悠百年中剎那安可恃空華豈  
眼見標月非手指庶以目擊存窻風吹破紙

送無際北上

夜長不能寐念子常遠行吉夢為子來夢中占其祥如  
子韞文采其道當輝光晚達豈不佳服官猶壯強將子  
奮功名毋為歎參商

昔我與子交發言即同趣讀書不恥貧固欲行其意及

乎赴功名子前我輒寔心知不能同豈復敢為異子今  
揚天庭我終守衡泌子將為其難我亦安為易出處各  
自量苟同竟何濟

送子金閭道高闕何嵯峨笑彼夸奢子高危當奈何丈  
夫自有懷衆人鮮不波廟堂方鼎新一朝盪羣魔四  
海頌太平考槃亦寤歌況此詔公車彌天恢網羅束身  
事聖明豈不愛濯磨直言望吾子毋徒貴詞科

檀園集卷一

欽定四庫全書

檀園集卷二

明 李流芳 撰

七言古詩

凡三十一首

春雪有懷龔三仲和兼訊劉長卿張荃之

去歲以是日至

武林大雪又嘗值冬雪偕長卿荃之汎舟至石岡阻冰步歸城南石岡仲和別業也

去年此日西湖曲積素千山亂晴旭今年此日雪復驕  
排空匝野欺春條山樓四望何沈寥思君遙遙不可招

城南一棹衝寒路水抱山圍石岡暮酒醒風歇凍不行  
著屐歸來賞君句只今春花半含綺掩映山椒復何似  
花開雪落不相待我愁君病徒為爾人生發興真偶然  
吁嗟張生與劉子

重題荃之畫蘭

秋風蘭若長干客藁樹陰陰小窻碧千里間關遲子來  
殘燈細語為誰劇當時子畫我作詩今日開看已陳迹  
我昨送子寒城東荒草茫茫掩阡陌腸摧淚竭無奈何

手澤相誇竟何益吁嗟乎人生不死空有情慚媿傍人知愛惜

畫松石為翁吾鼎母夫人壽兼題長句

翁君彳亍何所適手持素縑長三尺屬余吮筆為作圖  
圖此青松與白石翁君有母孀居三十年青松比貞石  
比堅恩勤育子誠可憐感君使我情潸然男兒不能安  
與列鼎為親歡雖有菽水徒迍邐白頭厨中苦辛者誇  
數聖善何有焉翁君翁君慎勿迂東西奔走將何須江

寒木落歲云徂倚門之望不可孤入門一笑慈顏舒春  
酒春盤次第敷高堂素壁挂此圖君當亟歸勿踟躕吾  
聞君有仙人不死之術可以奉阿母何如此樂真良圖

與仲和期潭西看花仲和云當至洞庭已聞滯虎  
丘走筆寄嘲

我貪花月潭西住君愛烟波洞庭去還向潭西望洞庭  
指點雲峰是君處春晴山閣花無那十日尋花雙屐破  
輸君縹緲更軒豁歸應誇我峰頭坐張生曉發吳門來

傳君猶滯生公臺千場紅粉亦快意萬頃琉璃安在哉  
我昨期君訪舊遊掉頭別我神何道知君未慣風波色  
且伴鶯花穩一丘

過郎當嶺口占示汪無際

去年汪生到雲棲相戒莫翻郎當嶺今年我與翻郎當  
始知此山實奇頽是日風雲氣變幻兼之巖壑勢雄猛  
雲移日影千山來風入泉聲百道冷愛此盤旋忘阻折  
足雖郎當意馳騁吾生浪跡詎可量太華終南有絕頂

茲山郎當未足道誰為此名乃予傲汪生汪生幾誤君  
使我臨風發深省

秋風行送張子崧之白下

秋風水綠秦淮里香閣珠簾映淮水隔岸倡樓十萬家  
日日笙歌醉羅綺吾儕酒徒老亦狂不論文飲紅裙彊  
闌中就草日未落脫帽急走青樓倡曲頭小姬歌擅名  
雙鬟倚酣徐發聲風生月出夜將半掉頭曲罷鍾山青  
人生此樂豈常有送子江干重回首男兒富貴自有時



但遇風流莫相負燕臺漠漠塵紛紛天寒路長愁殺人  
我今別子且欲往為子先驅多苦辛

南歸戲為長句自解

人言債多能不愁我今真作隔夜憂天生吾舌尚可用  
況有薄技供遨遊但恐饑寒命所注縱有衣食非人求  
一家嗷嗷三十口老母弱子將焉謀我欲賣却百畝田  
不堪持作三年羞不然計且無復之請屏所愛不一留  
先賣几頭子石研不愛墨花繡澀春雲流次賣商尊父

丁篆不愛寶色剝落夔龍紕次賣西山梅花二十畝不  
愛春湖草閣臨青浮最後賣却山雨之飛樓不愛松風  
梧月芙蓉秋如此不足辦吾事天實為之吾何尤人年  
四十老將至譬如已死亦即休

潘克家將韶賓邀遊善卷寺酒後偶成

我生好遊天作緣昨日風雨今晴川泊舟遙愛松際寺  
入門稍覺風中泉恍然便與幽意慳何況突兀巖崖前  
咄哉兩洞大奇絕使我心神猶宕跌雲端仙掌殊可辨

四壁烟霞互明滅石牀丹竈亦宛然鹽堆米積何纖屑  
却思造物有底意為此形模巧施設仙人已去山鬼來

虎豹疾走蛟龍迴吾欲上下窮兩崖水深可泝閣可開

褰裳濡足亦徒爾胡不久留但裴回君不見祝娘遺跡

今荒臺當年讀書安在哉

寺相傳為祝英臺讀書處今有臺尚存

三生因

果亦茫渺虛堂寂歷松風哀

寺為唐丞相李蟻所創至宋李綱李遵伯復新之或

以為一姓三生故事有三生堂云

嗟我何為墮塵趣十年不踏荆溪路

張公玉女入夢頻聞誇善卷空復妬今日何日果此緣

山僧地主欣相遇經時未豁塵土腸一朝欲向山靈訴

汧汧蔣吳區潘

蔣居汧汧潘居吳區皆近善卷寺

二子知我我不謾百

年易盡歡不足胡不買山偕盤桓子今有山不肯居我  
今無錢欲買難待我有錢知幾時蹉跎離墨與銅官

壽方孟旋母鄭太夫人

去年方子就我別荷風疎疎送餘熱執手欲話燕路長  
低頭倚閤心已折今年春風失意歸別子又見秋風飛  
遙知秉燭情相似欲寄壺觴伴綵衣俄聞介壽當茲辰

願言持此稱千春山川悠悠隔吳越雖有懷抱無繇伸  
翻思燕市擊筑時與子心期豈爾為陶母廚中正辛苦  
區區升斗猶參差男兒變化未可料安能屈首甘常調  
由來菽水亦自歡朱門梁肉徒誇耀我懷此意私吐吞  
非子莫敢相為論亦知阿母自聖善不至河漢吾此言  
倚雲山頭卜築成千頭木奴遶宅生陽溪百仞清見底  
夾岸朱實丹霞明美哉風土神仙居阿母保之樂有餘  
爛柯日月長不老回看塵土將何如

送程孟陽遊楚中

我昨勸君為楚遊，喜君翻然即掉頭。今日置酒與君別，  
見君行色我始愁。平生心知兩莫逆，人言君癡我亦癡。  
村扉城郭嫌疎索，那能別此長為客。去年送我揚子湄，  
焦山落日江逶迤。豈意今年復送君，楚雲湘水勞相思。  
君家書閣秋山中，千山萬山松入風。我亦買山梅花裏，  
誅茆卜鄰期子同。惜哉此意不得遂，連年飄泊徒西東。  
人生萬事常相左，饑來驅人欲誰那。君今新得賢主人，

相將且拽寒江柁江月山花遠趣君詩囊畫本留貽我  
小築看荷花偶成

白公堤畔烟湖空四月未盡荷花紅兩湖盪漿無一朵  
小築已見千花蓼昨日梅雨天多風風翻雨打花龍鍾  
今朝日出方照曜半晴半陰態愈工君不見雷峰倚天  
似醉翁霧樹欲睡紛朦朧此花嫣然向我笑怯怯新妝  
出鏡中新妝美人正可喜笑而不來情何已且拚一斗  
酬醉翁此翁情澹如烟水

蓴羹歌

恠我生長居江東不識江東蓴菜羹  
今年四月來西湖  
西湖蓴生滿湖水朝朝暮暮來采蓴  
西湖城中無一人  
西湖蓴菜蕭山賣千擔萬擔湘湖濱  
吾友數人偏好事  
時呼輕舸致此味柔花嫩葉出水新  
小摘輕淹雜生氣  
微施薑桂猶清真未下鹽豉已高貴  
吾家平頭解烹煮  
間出新意殊可喜一朝能作千里羹  
頓使吾徒搖食指  
琉璃盃成碧玉光五味紛錯生馨香  
出盤四座已歎息



舉筋不敢爭先嘗淺斟細嚼意未足指點杯盤戀餘馥  
但知脆滑利齒牙不覺清虛累口腹血肉腥臊草木苦  
此味超然離品目京師黃芽軟似酥家園燕笋白於玉  
差堪與汝為執友菁根杞苗皆臣僕君不見區區芋魁  
亦遭遇西湖尊生人不顧季鷹之後有吾徒此物千年  
免沈錮君為我飲我作歌得此十斗不足多世人耳食

不貴近更須遠挹湘湖波

袁石公盛稱湘湖尊菜美不知湘湖無尊皆從西湖采去

以湘湖水浸之耳尊菜初摘後以水浸之經宿則愈肥凡泉水湖水皆可浸不必湘湖水也今人但知有湘湖

之尊又因石公言謂非湘  
湖水浸不佳皆耳食者耳

西湖走筆贈雪嶠上人渡江尋雲門山

雲門山渺何許送君行隔江渚十年雙髻今何如千山  
萬山同逆旅西湖殢人我亦留君胡不留掉頭去我嘗  
愛君機鋒如劍鋸君亦愛我筆墨如風雨多生與君數  
相見此日分攜何足數空山無人雲作主猿狐悲啼虎  
豹怒衲衣綻盡蒲團空何必樂邦乃我土

泊百花洲寄孟山人於紫薇村

百花洲上髯翁宅幾度維舟就君客城頭古臺橫月明  
臺下胥江向城白落日曾迴曙塢船秋風屢挂橫塘席  
喜君好事餅壘賒喜君幽居門巷僻一朝到門主已非  
池塘柳色空依依歎息此翁無住著十年九徙何時歸  
山中雲物知好在舊日酒徒應到稀自笑無家猶畏徙  
跼蹐里中徒忍饑不如放浪從君去愛殺村翁住紫薇  
婁江舟中題畫送王平仲遊南雍

黃姑灣頭黃梅雨複岸重岡映村塢布帆遙為故人開

一片離心寄江滸金陵悠悠隔烟樹故人指日金陵去  
男兒會當有知己三十成名未云暮桃葉渡頭小槳迎  
雞籠山下蹇蹄輕勝事因風向予說舊遊何處不關情

贈鶴石翁

十年不見鶴石翁舊日酒腸今在否當年名飲推吾徒  
豈意參商成白首我今且老何況君惜哉當年臂鷹手  
每憶君家壓手杯一飲千杯不停口酒後瀾翻說古今  
目睛煌煌爛如斗年來沉飲但閉門我來叩門亦不有

却思結客少年時，變滅白衣與蒼狗。我嘗許君贈一言，  
不覺蹉跎廿年後。如君沉淠古所無，我欲名君君不受。  
常恐心期却負君，喜君六十猶抖擻匡牀擁膝晚未起。  
秋光熒熒照蓬牖，壯士且復能飲乎。酌以大斗祈黃耆。

嚴太夫人生日歌

我愛西湖三嚴子，生長西湖山水裏。兄酬弟唱情性真，  
詩腸酒德堪驅使。板輿時曳兩峰烟，畫舫常浮三塔水。  
天生兄弟皆好奇，日奉慈幃多燕喜。我生區區貴適志，

富貴不來來亦去羨君神仙不易得君猶對我嗟不遇  
自言高堂常寡歡令我稱觴為大言我今落魄更可笑  
窮苦之言安足存憶昨東歸意偏側入門彊笑無顏色  
忍聞慈母慰遊子此意吞聲杳何極男兒逢世知己疎  
欲決不決何躊躇青鞋布襪掉頭得念此尸褻兼倚閭  
咄咄三嚴子與君相知數年矣豈不知子心中事人生  
免俗固難爾借子樽中酒上子阿母壽莫論富貴與窮  
愁過耳悠悠皆不有君不見雲棲古佛今導師說法平

等無參差前年吾母往頂禮旋聞阿母同皈依團團且  
說無生話捧檄聯翩自有時

友人吳瑞生嘗患腹痛自言遇小不平輒發以酒  
澆之則止酒醒復然余聞而異之為作此歌不敢  
望枚生七發聊用廣瑞生意耳

袁生嘗有言人不可無癖天下難醫是俗病往往奇人  
有奇疾吳郎灑落風流人何事捧腹常呻吟自言此中  
多礪礪遇事輒發誰能禁初如車輪輓轡攪繼乃干戈

劍戟擾但得一觥春融融無那酒醒愁渺渺余聞此言  
三歎息此症未許庸醫識余老世途屢折肱請為放言  
代草檄君不見此中空洞自本來何處崎嶇得荆棘會  
當筭經卷五千兼可容卿輩數百有時五嶽起立江河  
奔有時青天萬里雲無迹紛紛冰炭徒滿懷摩挲祇供  
一笑劇勸君不用純灰三斛洗世間亦無中山千日醴  
酒不為功亦非崇但請皈心向慈氏為君剗却人我根  
到處常得輕安體



戲贈吳鹿長

去年逢子西湖曲新妝綺疏映湖淥一曲千杯笑不停  
燈下酡顏勝紅玉今來豐干子出迎訝子形骸太瘦生  
自言脾病連三月齋廚冷澹如枯僧吁嗟別子曾幾時  
昔時豪華今爾為吳郎吳郎我知子子病可療癖難醫  
自古鍾情在我輩僕本恨人諳此味風流老却夢已陳  
古劍悠悠猶有氣桃葉渡頭望眼賒秦淮月對白門斜  
朱絃罷弄烏絲濕我聞斷腸況子耶我嘗愛子胸懷真

少許却勝多許人但恐君情猶未至情癡未足為君累  
縱令黑瘦來清虛不似肥癡擁渣滓況子貌枯神轉腴  
高譚炯炯雙眼珠豈有此人為情死終看夢覺成相遠

贈別吳正子

華屏山頭月初上喜子能來共村醺河西橋外雪片飛  
愁子衝寒匹馬歸憶昨豐干初見子向我喃喃情不已  
欲扶風雅回波瀾不為區區念桑梓君不見豐溪村中  
十萬家朱門梁肉紛如麻吳生閉門守四壁百城萬卷

徒相誇囊空不肯留一錢好客時時沽十千腰間湛盧  
脫手贈匣裏自保朱絲絃我今別子行復東扁舟直下  
隨飛鴻新安江清釣臺矗此時念子心忡忡吁嗟乎吾  
儕意氣豈輕擲一腔雖丹雙眼白君看世路皆悠悠別  
後頭顱好珍惜

洞庭看梨花東別王淑士

與君期看盤螭花忽漫乘風洞庭去洞庭十萬梨花村  
村村花發當湖曙石公山西龍渚灣毛公壇下包山寺

幽奇秀特天下無臨風絕叫何由寄生平小別無三月  
相思索索動盈札自從升沉隔雲泥江波渺渺吳天濶  
別君三年一見君簡書催君行復發君不見城東歲暮  
雨憲西兩度幽懷不能說白門洵佳麗何如故山好清  
遊尚難同況乃期汗浩知君買山懷遠志笑我干時戀小  
草他年出處兩茫茫長使青山看人老

盤螭山訪覺如上人不遇

三年十月盤螭路石脚紆回矮松樹誰開絕凹香茅宇

四壁圍丹門，漾素重來春。濃山正午，湖光欲曙，花將暮。  
兩度尋僧，僧不遇。小憩幽窻，覺禪趣庭中殘桃自送迎。  
湖而浮峰，無去住。君不見六浮山閣，今非主。六浮居士  
居無處，欲乞一單。終餘年坐對青山叅活句。

余買一小丘於鐵山下，登陟不數十武而盡攬湖  
山之勝。尤於看梅為宜。蓋踞花之上千村萬落，一  
望而收之。久欲作一小閣，名為六浮六浮之名遂  
滿人耳。而閣竟不就。友人鄒孟陽見余歎息，每欲

代為經營今日始引孟陽至其地亦復叫絕不能  
已余因為作六浮閣圖兼題一詩冀孟陽無忘此  
盟時丁巳八月十八日也

十年山閣不得就却負青浮日夜浮故人一見豁雙眼  
何日三間銷百憂冰花琪樹亂檻外銀山雪屋排簷頭  
百年有錢作底用一朝卜築偕行休君家西湖我震澤  
往經冬夏來春秋十千到手即可辦非我求君君自謀  
虎山踏月行示同游鄒孟陽張魯生

靈巖脚下斜橋路一路橫拖山水去秋風秋月幾度來  
風月關心舊遊處穹窿欲盡湖山開落日閃閃青烟來  
虎山橋頭山色闇明月遲我猶徘徊凭橋東望遮山立  
明月正向遮山出遮山遮月不遮光陸離寶氣初離室  
須臾山尖露半彎突兀捧出黃金盤四山蒼然一水白  
玉刻橋梁銀作欄吁嗟乎張生昔年與汝橋上行虎山  
十年月再明同游幾人復誰在鄉月照我空多情吁嗟  
乎鄒子子今真見虎山矣虎山烟月竟何似當年畫出

虎山時橋上之人吾與汝子兮子兮奈此良夜何磯頭  
夜深風露多遊人欲歸殘酒醒試聽中流踏月歌

西湖喜遇譚友夏賦贈

誰言譚郎貌似我執手問人還似無寸心明白已如此  
區區形似終模糊我昔知子因子詩曉月殘雪風鳴枝  
境清音寥意飄忽虎井數篇猶可思吳江楚嶠兩遼闊  
期子不來空歲月西湖烟水我為鄉豈知此中有譚郎  
十年相求始相得停車下船各歎息欸然魂魄化為一



異者衣裳與巾舄城中兄弟情好偏非我與子神不全  
兩山紅葉正相待子詩我畫交無嫌我家震澤梅花裏  
湖氣花光三十里留子共度梅花時且待春深上湘水

風雨吟

風風雨雨江頭路多少離人從此去欲將別泪寄黃溪  
昨日黃溪在何處歸帆一挂不可收西泠橋邊人倚樓  
獨酌孤眠不成夜又教風雨伴儂愁

題畫贈潘子方孺

吾聞泰山五大夫之松干雲礙日摩蒼穹廿年奔走燕  
齊道無由扣嶽攀虬龍考之所聞及傳記此松不復仍  
秦封松壽千年亦常耳況此神物間氣鍾帝王褒崇萬  
靈護不天斤斧誰能窮樹猶如此人則那長生久視安  
可逢吁嗟乎潘子與汝同庚吾先汝相看同是知非翁  
弱冠論文今老矣當年意氣凌雲霄不貴不去真可恥  
四十九年成一往百年彊半能餘幾儼將末後見先師  
莫漫隨流稱蕩子君不見此五松圖意長楮短可奈何

千雲礙日空想像橫柯接葉聊婆娑吾儕屈折亦如此  
歲寒自保應無他

送汪君彥同項不損燕游兼呈不損

汪生昨自樵李還忽然向我譚長安自言指日長安去  
及此春深花事闌嗟乎汪生何太迂少年不肯守牀幃  
因人遠役將何為我是長安舊游人三年一度長安春  
如今怕說長安道送子忽忽傷心魂長安城中有何好  
惟有十丈西風塵人畜糞土相和勻此物由來無世情

貴人逢之亦入唇其味不減庖廚珍別有高粱橋下水  
柳色一灣塵似洗從此沿流向玉泉湖山亦有江南意  
充君畫本差可耳君不聞京師畫工如布粟閩中吳彬  
推老宿前年供御不稱旨褫衣受撻真隸畜此事下賤  
不可為君但自娛勿干祿吾友重瞳之孫氣食牛萬金  
散盡圖千秋一朝掉頭出門去為我問之何所求君應  
朝夕進苦口勉之閉門發策勿妄侈交游

江南春

次倪元鎮韻

錦棚簇簇東園笋宿雨初收池面靜柳條欲織畫簷絲  
花枝為寫疎簾影寒食風來山店冷輓轡聲香臘脂井  
山前日暮烏銜巾繡陌香泥闇麴塵鶯聲遲花信急裊  
露穿花羅袖濕常恐春歸歡不及飛紅盡處千林碧不  
見花洲舊吳邑洲上要離塚猶立楊花滿洲生綠萍百  
年易度胡營營

天平山頭石如笋松陰落日游人靜射瀆千帆曳練光  
胥山萬水留寒影響廊空履痕冷館娃舊事沉宮井

欽定四庫全書


禮上集  
卷二

鴟夷歸來裹角巾吳臺越榭皆烟塵春水生春潮急西  
泠渡頭莎岬濕我欲渡江潮已及對岬千峰萬峰碧闔  
閭勾踐空城邑男兒功名幾時立眼看身世如漂萍驅  
車策馬將何營

題葉熙時空香閣

我昔名齋以六香其中空香亦居一香本着物非從空  
以空名香非其質曰空無相諸塵生謂空無香義亦失  
香塵之體本來空空空諸塵熾然出葉子構空閣獨愛

聞空香豈徒屏除沉水與檀麝奇茶妙墨皆無當酒亦不能馨花亦不能芳凡彼有相皆有壞此香乃始名真常雖然更有說此義非究竟空香若為聞為復有聞性聞性若不空香塵豈能淨空無駐香體香不與空緣鼻非往空處空非來鼻邊空香閣中人謂此然不然



欽定四庫全書

卷二

檀園集卷二



欽定四庫全書

集部

檀園集卷三至六

詳校官中書

臣徐志晉

侍讀臣孫球覆勘

總校官進士臣朱鈴

校對官修撰臣戴衢亨

謄錄監生臣史元善

欽定四庫全書

檀園集卷三

明 李流芳 撰

五言律詩 凡四十六首

病中東徐孺穀將有白下之役

踈踈庭欲雨  
花落閨高梧  
月氣昏三伏  
天涼無一娛  
病將愁共到人  
與夢俱徂心  
怯丹陽道  
知君好去無

除夕 癸卯

除夕人猶病挑燈思惘然夢魂驚隔歲雨點入新年笑  
為小兒劇酒因慈母顛生涯兼世路只有且隨緣

石岡園池同仲和泛舟作

共道春園好偏宜泛一尊輕陰低竹塢落日駐花源水  
動魚迎棹人歸鶴候門相看無限意愁殺近黃昏

除夕

甲辰

愁事殊不了如何已歲除千門宵鼓後半榻佛燈初性  
癖甘從笑交貧或易疎隨緣吾未得世路正躊躇

三十等閒過行藏定若何年華隨樂盡風雨逐愁多  
小  
妹初離閣故人仍抱病關懷今夕事不獨歎蹉跎  
村酒不復醉殘燈影漸移家無終歲計人有隔年期  
骀  
騁知難遇浮沉意已衰笑憐兒繞膝黽勉慰家慈  
忽憶去年夜苦吟猶病中但令身健在且莫怨途窮  
野  
萼今將發清尊幸不空只愁難免俗明發又匆匆

春盡同仲和泛舟溪山堂

雨晴春又盡忽忽信舟輕松嶺雲不定柳塘風易生出

波雙浴鶴隔竹一啼鶯何意林芳歇幽懷得共傾

讀書仲和郊居寄懷孺穀

相對忽相憶春山不見君飛花何太急啼鳥故成羣癖  
似嵇生嬾知慚鮑叔勤昔年題壁處寥落隔松雲

贈通上人

未識通師面新詩已競傳竹間開卷帙屋外迴江天  
雨一相見風塵意豁然欲隨師卜築瀟灑共安禪

白門七夕感懷

舊日維舟處懸情獨柳條秋風又京國客思正江湖長  
路有時到歡期難再邀  
裴徊望牛女愁絕向中宵

贈別洞庭葛實甫

我懷洞庭月欲醉莫釐峯幽意久不愜高人今乍逢  
新詩正堪把歸櫂阻相從却羨秋山下丹黃已萬重

九日風雨泛舟石湖

客思逢重九來尋雨外山未能凌絕頂聊共泊西灣  
茶磨風烟白薇村木葉斑誰言落帽會不醉復空還

送龔三仲和就試白下

送子白門去因之感舊遊挂帆江月曉問寺竹風秋  
藜杖臺前路紅妝水面樓風流知好在遠想日悠悠

最愛清涼寺朱門綠樹開晚風齊策蹇落日每登臺  
雨外江光白城邊石勢隤通公禪室近還與共裴回

同病憐羈旅山風想對牀相看愁去住豈敢問行藏  
菰芥吾猶遇飛騰子詎量烟寒郭臺畔貰酒正相望

清河道中東同行宋上木

漠漠黃河岸荒荒落日風鄉關鴈影外客路水聲中吾  
道只如此心期偶得同寂寥佳節近忍負菊花漿

黃河九日寄懷家中兄弟

去年重九日風雨石湖中屈指登高處三年無一同亦  
知懷遠道且復信飄蓬阿母秋園裏應憐萸酒紅

江路寒仍晚重陽候未回遙知新酒熟不待菊花開郊  
北秋宜眺村東客好來河流向天際難覓一登臺

黃河夜泊



明月黃河夜寒沙似戰場奔流聒池響平野到天荒吳  
會日以遠燕臺路正長男兒久為客不辨是他鄉

舟中雜興

辭家兩見月兀兀開河邊長路難計日逆流如上天扶  
攜幸相得宴坐亦翛然始識浮家意伸鉤擬釣船  
推蓬殘卷後秋興正相宜飯燥香杭鉢羹勻玉糝匙飽  
食無一事翻憶在家時多少風塵子天涯長苦飢

任城舟中得家報述懷

聞道家鄉水秋來又殺禾正愁生計少其奈薦飢何阿  
母廚中意賢兄柱下歌天涯一回首不敢畏風波  
自笑逢時懶茲行亦偶然為貧無不可患得敢爭先溝  
壑吾生事簞瓢可送年寥寥故人意三復贈行篇

游任城南池

塵土經時面南池一豁然城孤朱閣外亭小綠荷前望  
迴蒹葭水秋高楊柳天猶傳杜陵句幽意至今憐

太白樓

斯人不可作秋望轉蒼蒼濟水東流直梁山北去荒千年同客路一艤即吾鄉尚想登臨處當時號酒狂

荆門舟中見菊偶成

江路重陽月荒城菊未花一枝今始見小摘向人誇研水添生意鄉心對物華遙憐開爛漫濁酒過鄰家

清淵逢鄉人南還

君整南歸棹予隨北上船他鄉一相見故里色依然只覺還家好都忘失意憐平安仗傳語早晚下江天

移舟入荷池同孟陽方回小泛

風池弄小艇偃仰芰荷繁葉與遠山碧花將落照紅衣  
裳散香澤樓閣擬虛空漸覺離塵世來游淨土中

為楊識西題斷橋小景

十里西湖意都來在斷橋寒生梅萼小春入柳絲嬌乍  
見應疑夢重來不待招故人知我否吟望正蕭條

新安江中有懷玄度伯昭諸子

對酒半輪月隨舟兩岸山碧潭寒見底怪石巧當灣自

覺勝情愜誰言客路艱別歸臨歲晏祇愴故人顏

西湖小築次韻答子與

不是我頻到安知君病多如君好神氣且莫厭沉痾山  
潤經時雨樓香四面荷還應思小築稍健即來過

疊前韻重寄子與

嵐氣不出戶南山朝雨多烹茶翫水色持此滌煩痾有  
客衝林靄維舟傍芰荷隔溪欲相喚或恐是君過

次韻答西生上人見寄

小閣溪風夜至今來夢中近聞添結構坐臥在空濛多  
病成予嬾新詩見子工遙看翠微路幽意若為通

戲東湯吾狂于靈隱精舍

靈隱蓬峰下飛泉六月涼相望隔烟雨欲往復傍晚晚  
霽紅半閣蕉陰綠一牀愁聞湖上鳥終夜叫吾狂

湖上有鳥

其聲曰吾狂  
徹夜不已

雨中喜蓮壑自朗至

朝與在羣木焚香對南山颯然飛雨至靄爾翠微閒孤

詠無所寄林僧來叩關不知道壑裏高興幾時攀

西湖寄沈無回於黃巖

台蕩古名勝但言心已馳一羶難穩坐雙屐好相隨去  
郭聞尚遠出遊知幾時因風須示我妙畫與新詩

長安攜手日去住各踟躕念子胸懷濶如予生計疎不  
知山縣裏風物竟何如但願少人事還能讀我書

靈隱次穎法師韻

往來白雲社坐臥丹楓林齋飯經未罷應門僧屢尋出

寺不覺遠向山情轉深前溪正落日去住亦無心

殘臘

殘臘尚幾日新晴暄氣來遙知早梅意欲傍歲朝開十  
載青芝路千山白雪堆扁舟繫門柳獨往興悠哉

寄胡仁常民部

春明一回首動隔十年期楚水日東下燕雲常北馳夫  
君美無度畏壘有遺思國士終何報悠悠媿所知  
懷抱偶然合何云出處間雲霄既已遠丘壑豈徒閒海



國餘黎在飢年賦額慳回天竟誰力凋瘵一時還

二月五日自虞山還文休遲予於鹿城同張冲善  
少謙顧子貽幼疏步屨山間因過幼疏夜飲限韻  
得村字

故人遲我至一笑玉山原有酒便須酌忘形豈待言花  
疎能照夜月細已橫村莫怪常深坐應非戀一樽

次日同文休子崧靜之子貽幼疏集冲善齋中限  
韻得燈字

書齋梅未落過雨態猶勝會以花時數詩因客興增濕  
雲晴不去春氣酒能凌醉覺衝泥怯船窻迴一燈

夏華甫水亭邂逅甬東朱漢生已載酒重過與漢

生集別

作合此亭中忘機愛野翁無多成水石隨意得房櫳雨  
氣先梅到風光隔竹通重來興方洽尊酒莫匆匆

題半塘陸仲子新居

其兄伯子所居鄰  
比兄弟皆善絃歌

好是幽人宅偏於水木便天然松障子宛在竹窻前晚

照留僧閣茶香到客船  
壩簾方比舍曲罷又聞絃

五言排律

三首

臯亭送張爾完東歸爾完從慧法師聽講彌陀疏  
鈔初受五戒

相近不識面相逢恰稱心  
亦知文筆妙不謂道情深  
得共蓮花社遠來祇樹林  
飛泉初雨後落日復松陰  
幽賞正未已玄言殊可尋  
別君何草草歸路慎浮沉

寄無際於會稽兼訊張使君宗曉

夢中與無際同游賦詩有樓亦

生霞思之句  
因為續之

故人前月去言訪雲門蹤此地美林壑為懷況秋冬碧  
淙雲外細丹葉霧邊濃樓亦生霞思山尤愛雪容蘭亭蹟  
已謝剡曲舟靡從張緒如相見知予老更慵

春筍詩

春園風物好二月筍生時愛此錦棚子參他玉版師嫩  
休論菜甲滑可比萼脂酒辣偏相稱茶清更不疑味存  
甘苦外質與剛柔宜上番看何意平安報有期此君真

不俗少具出塵姿

檀園集卷三